

Nunap immikkoortuini ineriartortitsinermut iliuusissat pillugit nassuiaat.

(Naalakkersuisut Siulittaasuat aamma Nunanut allanut tunngasunut Naalakkersuisoq)

Saqqummiussissut

(Naalakkersuisut Siulittaasuat)

Naalakkersuisut sinnerlugit nunap immikkoortuini ineriartortitsinermut iliuusissat pillugit nassuiaat, pingaartumik kommuunit qanimut suleqatigalugit suliarineqarsimasoq matumuuna saqqummiutissavara.

Taamaattumik piffissaq iluatsillugu nassuiaatip suliarinerani angusaqarfiussamik anersaaqarluni suleqatigiissimaneq qujassutigerusuppara. Qujanera kommuunit KANUKOKA-mullu, ilinniartoqarfinnut soqutigisaqatigiillu kattuffiit assigiinngitsunut, taakkununga ilanngullugit sulisoqarnermi suleqatigisanut KNAPK-mut, IMAK-imut KANUNUPE-mut SIK-mullu aamma tunngavoq.

Imaanngilaq, nassuiaamut matumunga ilanngussaarsimasut soqutiginnittullu tamakkiivissumik nassuiaatip imaanut 100%-imik isumaqataasut. Taamaattumik aamma nassuiaat tassaangilaq, nunap immikkoortuini ineriartortitsinermut iliuusissat pillugit nassuiaamut peqataasut siunissami ineriartornissamat kissaataannik minnerpaaffiliineq. Nassuiaat tassaavoq nunap immikkoortuini ineriartortitsinermut iliuusissat pillugit sulinermi nuna tamakkerlugu kommuunit sulinerup nalilersornissaanut missiliut, suliassatsinnullu aggersunut pingaarutilinnik naleralersuinissatsinnik tikkuussissutiginiagassarput.

Naassuiaammittaaq inuiaqatigiittut ataatsimut assoroorfissavut periarfissavullu annertuut, taakkualu nuna tamakkerlugu kommuunit iliuuseqarnikkut qanoq aqqinniarneqarsinnaanerit pingaarnersiulluni taakkartorneqarput. Nassuiaat suliassaqarfinni tamani eqqarsaatersuutit ineriikkanik imaqqangilaq. Suliatta ingerlateqqinnissaani erseqqissaaneq, pingaarnersiuneq pilersaarusiorterlu nangeqqissavagut.

Taamaattumik Naalakkersuisunut nalitoorujussuovoq, Inatsisartut nunap immikkoortuini ineriartortitsinermut iliuusissat pillugit nassuiaatip oqallisiginissaanut isummaminnillu saqqummiussinissaminut periarfissaqalermata. Taakkualu soorunami suliap ingerlateqqinnissaani ilanngunneqassapput, aamma AIS 2012-imut piareersarnermut atatillugu.

Nunap immikkoortuini ineriartortitsinermut iliuusissat siusinnerusukku suliaareersimasunik arlalinnik nangitsiffiupput, aammalu Akileraartarneq Atugarissaarnerlu pillugit Isumalioqatigiissitat, Assartuinerlu pillugu Ataatsimiititaliarsuup isumaliutissiissutaannut uiggiullugit politikikkut aalajangiussassaajumaartussanik katersuuffiussallutik.

Taamaattumik Naalakkersuisut naatsorsuutigaat iliutsit sunniutaat ineriartornermilu pingaarnarpaani sapinngisaq tamakkerlugu isumaqatigiissitsiniarnissaq siunertaralugu, nunap immikkoortuini ineriartortitsinermut iliuusissat pillugit siuariartorneq pillugu Inatsisartunut ukiut tamaasa nassuiaasiortassallutik.

Nunap immikkoortuini ineriartortitsinermut iliuusissat pillugit tunngaviumik aallaaviulluinnartoq tassaavoq, kikkut tamarmik ineriartornissaminut imminnullu

pilersornissaminnut periarfissaqarnerisa inuiaqatigiit imminnut napatissinnaajartuaarneranni takorluugaqarnermi pitsaasunik sinaakkutassaqaqtinnissaat.

Inuiaqatigiit suliassaasa annertoorujussuunerannik paasinnilluni pilersaarut suliarineqarpoq, taakkulu Namminersorlutik Oqartussat kommuunillu qanimut suleqatigiissutigisariaqarpaat. Tassunga ilutigitillugu allanngoriartornerit amerlasuut pisortat namminersortullu pitsaasumik uummaarissumillu suleqatigiinnerisigut ingerlassapput, ineriartornerlu attanneqarsinnaasumik toqqammaveqassaaq.

Tamanna sulinissamut annertuumik piumasaqaatitaqarpoq, taamaattumillu anguniakkat ullormiit ullormut anguneqarsinnaanerit naatsorsuutigineqarsinnaanngilaq. Anguniakkat pingaarnerit ukiuni arlalinni anguniarnissat uani pineqarpoq, tassanilu aamma piumasaqaataavoq, nunap immikkoortuini naalakkersuinikkut ineriartortitseqqinnissami innuttaasut soqutigisaaqatigiiffiillu peqataatinneqarnissaat. Tamanna nunap immikkoortuini ineriartortitsinermit iliuusissap qulequtaani ersersinneqarpoq: *Illit najugaqarfiit – illit toqqaanerit.*

Nassuiaammi allassimasutut, innuttaasut inuiaqatigiittut imminnut napatissinnaasutut pitsaasumik atugarissaartutut takorluugaq anguneqassappat, nuna tamakkerlugu nunallu immikkoortuini ineriartortitsinermit politikki suliassaqarfinni assigiinngitsuni inuiaqatigiillu tunngaviumik unammilligassanut sanillinneqartariaqarpoq. Tamakku nassuiaammi matumani Akileraartarneq Atugarissaarnerlu pillugit Suleqatigiissitap isumaliutissiisutaani allaaserineqarput.

Iliuussissat pingaarnerit arlallit uani erseqqissaatigissavakka:

- Aningaasaqarnikkut aaqqiinerit takutippaat, pisortat aningaasartuutaat pisortat isertitaannit siunissami qanittumi amerlanerujussuanngussasut, taamaasillutillu piffissap ingerlanerani pisortat aningaasaqarneranni annertuumik amigartooruteqartitsilissallutik. Tamanna inuiaqatigiit katitigaanikkut nuttarnikkullu ineriartornerannut attuumassuteqarpoq.
- Ullumikkut meeqqat atuarfianni atuaqatigiiaat naammassisut pisinnaalersitsisumik kingusinnerusukkullu suliffimmi aningaasarsiutigilluarsinnaasaminnik ilinniagaqalersartut ikippallaarput.
- Ilinniartitaanermit aaqqissuussineq ullumikkut naammattumik ataqatigiinngilaq, ukiunilu kingullerni ilinniagallit amerlisarniarlugit ilinniartitaanikkut immikkut ittumik iliuuseqarnerup kingunerisaanik amerlanerusunik ilinniartoqalersimaneq annertusiartortumik ilinniartitaanerup iluani kanngiffinnik nutaanik pilersitsivoq.
- Inuussutissarsiutitoqqat annerpaartaat aaqqissuussaannikkut ajornartorsiuteqarput, kisianni aamma inuussutissarsiortermit ineriartortitassat nutaat, allanik piginnaasaqarfigisassat timalersortussanngulerpagut. Tamanna suliffeqarnerup iluani inuussutissarsiutinillu siuarsaanermit tulluussarnissamik pisariaqalersitsivoq.
- Sulisoqarnermit sulisorisinnaasat pisariaqartitallu akornanni naligiinngitsoqarpoq. Tassungalu ilutigitillugu ullumikkut sulisorisinnaasaraluit imaaliiallaannaq sulilersinneqarsinnaanngillat. Ataatsimut isigisumik suliffeqarnermit tunngasut ilanngullugit iliuuseqarnissamik piumasaqaatitaqartunik suliassarpassuaqarput.

Nunap immikkoortuini iliuusissat nuna tamakkerlugu kommuunini anguniakkanut iliuusissanullu agguarneqarsimasunik arfineq-marlunnik anguniagassartaqarput. Kommuunit ilaatigut unamilligassanik taakkuninnga siunnerfeqassapput, ilaatigullu nunatta nunallu immikkoortuisa periarfissaat iluaqutigisinnaasaallu, nunat killeqarfii akimorlugit annertusiartuinnartumik unammillerneqarnitsinni periarfissat atorluarnissaat aqqutissiuutissavaat. Illoqarfimmi nunaqarfimmiluunniit najugaqarnerput apeqqutaatinnagu, suliassavut ataatsimut kivissallugit akisussaaqatigiippugut.

Nassuiaat Naalakkersuisut nuna tamakkerlugu kommuunerujussuarnilu sisamani tamani iliuuserineqarsinnaasutut siunnersuutigiumasaannik imaqarpoq. Taakkua assigiissutaat tassaavoq, innuttaasut suliffeqarfiillu siunissami nammineerlutik siumukarsinnaalernissaannik, siunissami iliuuseqarnissamut periarfissaqalernissaannik atugarissaalernerulernissaannillu kissaateqarneq.

Naalakkersuisut maannamut kommuuninik suleqateqarneq isumalluarnartutut isigaat aammalu nuna tamakkerlugu nunallu immikkoortuini politikikkut anguniakkat takorluukkallu piviusunngortinniarnernanni suleqatigeeqqinnissaq qilanaaralugu. Suliap ingerlateqqinnissaani assigiinngitsunut atatillugu pingaarnersiunerit imminnut akimoqattaattut aaqqiagiinngissutaasarsinnaanerit naatsorsuutigineqarsinnaavoq.

Taamaattumik Naalakkersuisut pingaartittorujussuuaat, nunap immikkoortuini ineriartortitsinermut iliuusissani ineriartortitassat ineriartortinniakkallu pillugit isumaqatigiittoqarnissaa. Tamanna apeqqutini ataasiakkaani, siunissamullu ungasinnerusumut anguniakkanik toraakkanik anguniagaqaannarnissamut, nunatta ukiuni aggersuni atorfissaqartilluinnagaanik, isumaqatigiinngittoqartillugu isumaqatigiinniarsarinissamik ajornannginnerulersitsissaaq.

Pisortani aningaasaqarnerup pitsaasuunissaa attanneqarsinnaasumillu ineriartortitsinerup siunissaq ungasinnerusoq isigalugu oqimaqatigiissuunissaat ataatsimoorluni politikikkut akisussaaffiuvoq, inuiannik kalaallinik ineriartornermut isiginnaartuutitsiinnangitsaq, ineriartornermilli nammineerluni oqaasertalersuiffiullunilu nunami matumani ineriartornermik aqutseqataaffiuvoq.

Taamatut oqaaseqarlunga pitsaasumik isumassarsiorfiulluarmillu oqallinnissamik kissaassillunga nassuiaat Inatsisartunut ingerlateqqippara.